

23 JAN 2001

Hamid-Senator

ABDUL HAMID ANGKAT SUMPAH SEBAGAI SENATOR

KUALA LUMPUR, 23 Jan (Bernama) -- Bakal Menteri di Jabatan Perdana Menteri, Datuk Abdul Hamid Zainal Abidin mengangkat sumpah sebagai senator di hadapan Yang Dipertua Dewan Negara Datuk Michael Chen di bangunan Parlimen hari ini.

Beliau merupakan antara dua Menteri baru yang diumumkan Rabu lepas oleh Perdana Menteri Datuk Seri Dr Mahathir Mohamad untuk menyertai Kabinet.

Abdul Hamid, yang menggantikan Datuk Dr Abdul Hamid Othman sebagai Menteri di Jabatan Perdana Menteri, berkata beliau akan meneruskan kerja-kerja baik bekas menteri itu.

"Apa yang baik akan saya teruskan...malah saya akan renung ruang-ruang dan aspek yang perlu dipertingkatkan lagi dan yang perlu saya akan perkuembangkan," katanya kepada pemberita selepas majlis itu.

Dr Abdul Hamid, yang meletakkan jawatan sebagai menteri pada 15 Jan lepas, kini dilantik sebagai penasihat agama kepada Perdana Menteri.

Abdul Hamid, yang baru bersara sebagai Ketua Pengarah Jabatan Kemajuan Islam Malaysia (JAKIM), berkata masih banyak yang belum dibuat untuk menerapkan Islam dalam soal pentadbiran tetapi menafikan perlaksanaan Islam dalam pentadbiran negara masih lemah.

"Perlaksanaan Islam di sini telah berjalan dengan baik malah perkembangan institusi Islam dan penyeragaman undang-undang syariah nampak begitu ketara sekarang ini," katanya.

Mengenai perpecahan orang Melayu disebabkan politik keagamaan yang dimainkan oleh pembangkang terutamanya PAS, Hamid berkata:

"Itu biasalah...saya rasa kita sama-sama belajar...saya belajar agama, dia belajar agama...sama-sama kita memahami Islam itu berdasarkan Quran dan Al Sunnah...buat apa kita pergi jauh pusing-pusing.

"Kita baliklah kepada intipati ajaran Islam itu sendiri...tak timbul benda yang boleh renggangkan persaudaraan kita...kita boleh berlainan pendapat tapi tidak perlu membawa kepada perpecahan," katanya.

Hamid dan Timbalan Menteri di Jabatan Perdana Menteri Datuk Shahrizat Jalil, yang dinaikkan pangkat sebagai Menteri Hal Ehwal Wanita, dijadualkan mengangkat sumpah jawatan di hadapan Yang di-Pertuan Agong di Istana Negara minggu depan.

-- BERNAMA

SLR AZZ RHM